

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO - OPĆINA ILIDŽA

OPĆINSKO VIJEĆE

Komisija za Statut i propise



BOSNIA AND HERZEGOVINA
FEDERATION OF BOSNIA AND HERZEGOVINA
SARAJEVO CANTON - MUNICIPALITY OF ILIDŽA

MUNICIPAL COUNCIL

Broj: 01-02-3125/10

Ilidža, 23.11.2010.godine

STATUT

OPĆINE ILIDŽA

(PREČIŠĆENI TEKST)

Ilidža, novembar 2010. godine

Butmirska cesta broj 12, 71210 Ilidža, Sarajevo, BiH,
tel/fax. 00387 33 775 731, centrala 775 600,
vijeceilidza@gmail.com

Na osnovu člana 2. Odluke o izmjeni Statuta općine Ilidža („Službene novine Kantona Sarajevo“, broj 24/10) i člana 95. Poslovnika o radu Općinskog vijeća Ilidža – prečišćeni tekst („Službene novine Kantona Sarajevo“, broj 4/99), Komisija za Statut i propise Općinskog vijeća Ilidža na sjednici održanoj dana 23.11.2010.godine, utvrdila je Prečišćeni tekst Statuta općine Ilidža kako slijedi

STATUT

OPĆINE ILIDŽA

(PREČIŠĆENI TEKST)

DIO PRVI – OSNOVNE ODREDBE

Član 1.

Ovim statutom uređuje se samoupravni djelokrug Općine, organizacija, ovlaštenja i način rada organa Općine, međusobni odnosi organa Općine, oblici neposrednog odlučivanja građana o lokalnim poslovima, osnivanje i rad mjesnih zajednica, organizacija i rad lokalne uprave, neposredno učestvovanje građana u odlučivanju, imovina i finansiranje lokalne samouprave, propisi i druga akta Općine, upravni nadzor, oblici saradnje sa drugim općinama i druga pitanja od značaja za ostvarivanje lokalne samouprave.

Član 2.

Općina Ilidža (u daljnjem tekstu: Općina) je jedinica lokalne samouprave.

Član 3.

Općina ima svojstvo pravnog lica sa pravima i obavezama propisanim ustavom, zakonom i ovim statutom.

Član 4.

Granica Općine utvrđena je Mirovnim sporazumom za Bosnu i Hercegovinu potpisanim u Parizu, 14. decembra 1995. godine, Ustavom Kantona i zakonom.

Član 5.

Granice područja Općine idu katastarskim granicama naseljenih mjesta koja ulaze u sastav općine u skladu sa zakonom i drugim propisima kojima se određuju naseljena mjesta.

Granice općine ucrtane su u katastarskom operatu, koji se nalazi i čuva u Općini.

Član 6.

Područje Općine, njen naziv i sjedište može se izmijeniti u skladu sa Ustavom, zakonom i drugim propisima, s tim da općinske granice ne mogu biti izmijenjene bez prethodne saglasnosti Općinskog vijeća.

Član 7.

Službeni naziv općine je: općina Ilidža.

U ravnopravnoj upotrebi je naziv: opština Ilidža.

Sjedište općine je u Ilidži, ulica Butmirska cesta broj 12.

Dan općine Ilidža je 12. marta, koji se svake godine obilježava održavanjem svečane sjednice Općinskog vijeća Ilidža.

Član 8.

Općina ima grb, zastavu i pečat kao svoja obilježja, a može imati i druga obilježja koja svojom odlukom utvrdi Općinsko vijeće Ilidža.

Sadržaj, opis, način upotrebe, davanje odobrenja za upotrebu, vođenje evidencije i druga pitanja od značaja za grb, zastavu, pečat i druga obilježja Općine utvrđuju se odlukom Vijeća.

Odlukom Vijeća utvrđuju se uslovi i postupak za davanje odobrenja fizičkim i pravnim licima za upotrebu službenog naziva i obilježja općine Ilidža.

Član 9.

Općina ima pečat oblika kruga promjera 30 i 50 mm.

Sadržaj pečata, davanje odobrenja za izradu pečata, način vođenja evidencije o izdatim pečatima, način uništavanja pečata i druga pitanja od značaja za izradu i korištenje pečata uredit će se posebnom odlukom Općinskog vijeća.

Član 10.

U Općini kao jedinici lokalne samouprave, građani Općine ostvaruju lokalnu samoupravu u poslovima utvrđenim Ustavom Federacije Bosne i Hercegovine, Ustavom Kantona i zakonom.

Član 11.

Poslovi samoupravnog djelokruga Općine i preneseni poslovi kantonalne uprave, koji se obavljaju u Općini, finansiraju se kroz budžet Općine i budžet Kantona u skladu sa zakonom.

Član 12.

Općina ima pravo u obavljanju svojih dužnosti saradivati sa drugim općinama radi obavljanja poslova od zajedničkog interesa, a sve u skladu sa ustavom i zakonom.

Član 13.

Službeni jezici u Općini su: bosanski jezik, hrvatski jezik i srpski jezik.

Službena pisma su latinica i ćirilica.

Ostala pisma mogu se koristiti kao sredstvo komunikacije i nastave.

II - OSTVARIVANJE I ZAŠTITA LJUDSKIH PRAVA I SLOBODA I SARADNJA SA INSTITUCIJAMA ZA ZAŠTITU LJUDSKIH PRAVA

Član 14.

U obavljanju poslova iz svoje nadležnosti, Općina će poštovati temeljna ljudska prava i slobode svih građana Bosne i Hercegovine i konstitutivnost naroda Bošnjaka, Hrvata i Srba zajedno sa Ostalima, te će osigurati u najvećoj mogućoj mjeri njihovu zastupljenost u skladu sa ustavom i zakonom.

Na području općine pripadnicima nacionalnih manjina garantuju se i osiguravaju osnovna prava i zaštita ravnopravnog učešća u javnim poslovima u skladu sa ustavom, Zakonom o zaštiti pripadnika nacionalnih manjina u Federaciji Bosne i Hercegovine i ovim statutom.

Općina će u okviru samoupravnog djelokruga preduzimati odgovarajuće i potrebne mjere radi provođenja odredaba propisanih Zakonom o ravnopravnosti spolova u Bosni i Hercegovini.

Član 15.

Svi općinski organi vlasti i njihova tijela, općinske službe za upravu i institucije koje vrše javna ovlašćenja, dužni su u vršenju poslova iz svoje nadležnosti primjenjivati i dosljedno poštovati prava i slobode građana predviđene propisima iz prethodnog člana.

Član 16.

Svi općinski organi vlasti i njihova radna tijela i institucije koje imaju javna ovlašćenja dužni su, na zahtjev ombudsmena i njihovih zamjenika, omogućiti ispitivanje djelatnosti bilo kojeg organa vlasti Općine i bilo koje druge institucije ili osobe koje su ugrozile ljudsko dostojanstvo, prava ili slobode, uključujući provođenje etničkog progona ili održavanja njegovih posljedica, dati potrebne informacije, dokumente i spise, omogućiti uvid u sva službena dokumenta, uključujući i tajne upravne spise i omogućiti saradnju od svake osobe, uključujući bilo kog službenika, posebno u prikupljanju potrebnih informacija o zaštiti ljudskih prava i osnovnih sloboda na području Općine.

Član 17.

Svi općinski organi vlasti dužni su, u okviru svojih prava i dužnosti, saradivati sa svim međunarodnim posmatračkim tijelima za ljudska prava, osnovanim za Bosnu i Hercegovinu i Federaciju Bosne i Hercegovine, kao i sa nadzornim tijelima osnovanim instrumentima Aneksa Ustava Federacije Bosne i Hercegovine.

Član 18.

Općinski načelnik odgovoran je za saradnju i omogućavanje ostvarivanja funkcije ombudsmena i međunarodnih nadzornih tijela, a posebno za saradnju sa općinskim službama za upravu i institucijama koje imaju javna ovlaštenja, predviđena ustavom, zakonom i ovim statutom.

III – SAMOUPRAVNI DJELOKRUG OPĆINE

Član 19.

Općina je samostalna u odlučivanju u poslovima iz samoupravnog djelokruga u skladu sa ustavom i zakonom, a podliježe nadzoru zakonitosti, koji obavljaju nadležni organi Kantona.

Općina u okviru samoupravnog djelokruga:

1. osigurava uslove i preduzima sve potrebne mjere za dosljednu primjenu, poštivanje i zaštitu ljudskih prava i osnovnih sloboda u skladu sa Ustavom;
2. osigurava lokalne potrebe stanovništva u oblasti brige o djeci, obrazovanju i odgoju, radu i zapošljavanju, socijalnoj zaštiti, kulturi, fizičkoj kulturi i sportu, zaštiti životinja i zaštiti bilja, ako zakonom nije drugačije određeno;
3. vodi urbanističko-stambenu politiku od značaja za Općinu i njen razvoj, kao što je izgradnja naselja i poboljšanje uslova stanovanja, uređenje građevinskog zemljišta, održavanje čistoće javnih površina, održavanje parkova, dječijih igrališta, održavanje javne rasvjete, odvoz i deponovanje otpadaka, angažovanje vatrogasne službe, zaštite od poplava te uređenje čovjekove okoline;
4. upravlja općinskom imovinom;
5. obavlja komunalne i druge uslužne djelatnosti, te lokalne infrastrukture, kao što je izgradnja i održavanje lokalnih cesta, putova, lokalnih mostova i druge djelatnosti infrastrukture od lokalnog značaja;
6. osigurava uslove rada lokalnih radijskih i televizijskih stanica, te lokalnih informativnih glasila u skladu sa zakonom;
7. vodi brigu o prirodnim i turističkim resursima Općine (poljoprivredno zemljište, šume, vode, divljač i sl.);
8. osigurava racionalno korištenje i upravljanje lokalnim građevinskim zemljištem;
9. osigurava javni red i mir;
10. obavlja upravne poslove iz samoupravnog djelokruga Općine;
11. osigurava uslove za ostvarivanje mjesne samouprave;
12. osniva javne ustanove i druga pravna lica u skladu sa zakonom radi ostvarivanja određenih gospodarskih, društvenih, socijalnih i drugih potreba stanovništva;
13. obavlja i druge poslove koji su joj preneseni u nadležnost u skladu sa zakonom.

Član 20.

Obavljanje pojedinih poslova iz samoupravnog djelokruga Općine može se u skladu sa zakonom povjeriti ustanovama, preduzećima i drugim pravnim licima osnovanim radi obavljanja javnih službi, o čemu odluku donosi Općinsko vijeće.

Općina se bavi svim pitanjima od lokalnog značaja koja nisu isključena iz njene nadležnosti niti dodijeljena u nadležnost neke druge vlasti.

Ukoliko federalne odnosno kantonalne vlasti svoje poslove povjere Općini bez prethodnog konsultovanja ili se Općina prilikom konsultovanja negativno izjasni o povjeravanju tih poslova, a federalna odnosno kantonalna vlast donese zakon kojim određene poslove ipak povjerava Općini, općinski načelnik dužan je odmah obavijestiti Općinsko vijeće i u tom slučaju Općina je dužna tražiti zaštitu prava na lokalnu samoupravu pred Ustavnim sudom Federacije Bosne i Hercegovine.

IV - ORGANI OPĆINE

1. Zajedničke odredbe

Član 21.

Organi Općine su: Općinsko vijeće i općinski načelnik, koji svoju funkciju vrše u skladu sa ustavom, zakonom i ovim statutom.

Općinski načelnik i predsjedavajući Općinskog vijeća Ilidža ne mogu biti iz reda istog konstitutivnog naroda, odnosno iz reda Ostalih.

Član 22.

Općinsko vijeće je organ odlučivanja u Općini.

Vijećnici odgovaraju za ustavnost i zakonitost akata koje Općinsko vijeće donosi u okviru svojih nadležnosti.

Član 23.

Općinski načelnik je izvršni organ Općine, koji svoju funkciju obavlja profesionalno i za to vrijeme ostvaruje pravo na plaću, kao i druga prava po osnovu rada u skladu sa zakonom i odlukom Vijeća.

Općinski načelnik odgovara za ustavnost i zakonitost akata koje donosi, odnosno predlaže Vijeću.

- Općinsko vijeće

Član 24.

Općinsko vijeće ima 27 vijećnika, čiji se izbor vrši na način i po postupku utvrđenim Izbornim zakonom Bosne i Hercegovine.

Član 25.

Nespojive su funkcije općinskog načelnika, savjetnika općinskog načelnika, državnog službenika i namještenika Općine sa funkcijom općinskog vijećnika i člana radnih tijela Općinskog vijeća.

Član 26.

Prva sjednica novoizabranog Općinskog vijeća održava se najkasnije u roku od 30 dana od dana objavljivanja rezultata izbora u skladu sa Poslovníkom o radu Općinskog vijeća.

Član 27.

Poslovníkom o radu Općinskog vijeća uređuje se način rada na sjednicama Vijeća, konstituisanje Vijeća, prava i obaveze vijećnika, predsjedavajućeg, zamjenika predsjedavajućeg Vijeća, način njihova izbora, imenovanja i razrješenja, način odlučivanja i donošenje propisa i drugih općih i pojedinačnih akata Vijeća, te druga pitanja koja se odnose na rad i funkcioniranje Općinskog vijeća.

Član 27a.

Radi olakšavanja rada Općinskog vijeća i unapređenja međustranačke saradnje općinski vijećnici mogu obrazovati klubove vijećnika parlamentarnih stranaka koje učestvuju u radu Općinskog vijeća.

Obrazovanje, djelokrug i način rada klubova vijećnika detaljnije se uređuju Poslovníkom o radu Vijeća.

Član 27b.

S ciljem unapređenja efikasnosti i usklađivanja rada Općinskog vijeća obrazuje se Kolegij Općinskog vijeća.

Sastav Kolegija, djelokrug i način rada uređuju se Poslovníkom o radu Vijeća.

2.1.

3. Nadležnost Općinskog vijeća

Član 28.

Općinsko vijeće:

- donosi Statut Općine;
- donosi odluke, druge propise i opće akte i daje njihovo tumačenje;
- donosi Poslovník o svom radu;
- bira i razrješava predsjedavajućeg i zamjenika predsjedavajućeg Vijeća i članove radnih tijela Vijeća;
- donosi odluku o utvrđivanju broja zamjenika predsjedavajućeg Vijeća;
- donosi odluke o načinu obavljanja funkcije predsjedavajućeg i zamjenika predsjedavajućeg Vijeća;
- donosi Etički kodeks izabranih zvaničnika općine Ilidža;
- donosi odluku o obrazovanju Stručne službe za poslove Općinskog vijeća;
- donosi budžet, usvaja izvještaj o izvršenju budžeta i usvaja završni račun;
- donosi program razvoja za pojedine djelatnosti iz samoupravnog djelokruga Općine i program razvoja Općine;
- donosi propise o općinskim porezima i na drugi način osigurava potrebna finansijska sredstva, u skladu sa zakonom;
- osniva javna preduzeća i javne ustanove i druga pravna lica za obavljanje privrednih, društvenih, komunalnih i drugih djelatnosti od interesa za Općinu;

- raspisuje referendum;
- raspisuje javni zajam i samodoprinos i odlučuje o zaduženju Općine;
- donosi propise o organizaciji i osniva organ uprave;
- utvrđuje nazive za dijelove naseljenog mjesta;
- podnosi inicijative za davanje i izmjenu naziva ulica, mostova i dr.;
- donosi Program rada Vijeća;
- odlučuje o zaduženju Općine i odobrava zaključivanje ugovora o kreditu;
- vrši druge poslove iz okvira prava i dužnosti Općine;
- vrši poslove drugostepenog organa kada je općinski načelnik rješavao na osnovu Statuta Općine ili propisa Vijeća;
- vrši druge poslove utvrđene zakonom i Statutom Općine.

2.2.

4. Prava i dužnosti vijećnika

Član 29.

Općinski vijećnik (u daljnjem tekstu: vijećnik) je predstavnik svih građana Općine u Vijeću, sa mandatom, pravima i obavezama utvrđenim ustavom, Izbornim zakonom BiH i ovim statutom.

Vijećnik odgovara za ustavnost i zakonitost akata koje donosi Vijeće u okviru svojih nadležnosti.

Prava i dužnosti vijećnika utvrđuju se Poslovníkom o radu Općinskog vijeća.

Član 30.

Općinski vijećnici za svoj rad u Općinskom vijeću i radnim tijelima imaju pravo na naknadu troškova, odnosno izgubljene zarade i prava na naknadu troškova koji nastaju u vršenju funkcije vijećnika u skladu sa posebnom odlukom.

Član 31.

Vijećniku se izdaje legitimacija.

Legitimacija vijećnika ne smije se ustupati drugim osobama.

Vijećnici su dužni starati se o korišćenju i čuvanju legitimacije.

O izdavanju i evidenciji izdatih legitimacija stara se sekretar Vijeća.

Sadržaj i oblik legitimacije, te način vođenja evidencije izdatih legitimacija uređuje se posebnom odlukom.

2.3.

5. Predsjedavajući i zamjenik predsjedavajućeg Općinskog vijeća

Član 32.

Općinsko vijeće bira iz reda vijećnika predsjedavajućeg i zamjenika predsjedavajućeg Vijeća na način i po postupku utvrđenim Poslovníkom o radu Vijeća.

Predsjedavajući i zamjenik predsjedavajućeg Vijeća svoju dužnost u pravilu obavljaju profesionalno i za vrijeme obavljanja funkcije ostvaruju pravo na plaću kao i druga prava po osnovu rada u skladu sa zakonom i odlukom Vijeća.

Izuzetno, od prethodnog stava o načinu obavljanja funkcije predsjedavajućeg i zamjenika predsjedavajućeg Vijeća, odlučuje Vijeće posebnom odlukom.

Član 33.

Predsjedavajući zastupa Općinsko vijeće i predsjedava sjednicama.

Zamjenik predsjedavajuće pomaže predsjedavajućem Općinskog vijeća u vršenju njegovih dužnosti i zamjenjuje ga u slučaju odsutnosti i spriječenosti.

Djelokrug rada predsjedavajućeg i zamjenika predsjedavajućeg Općinskog vijeća bliže se uređuje Poslovníkom o radu Općinskog vijeća.

Član 34.

Sekretar Vijeća je državni službenik koji se postavlja u skladu sa Zakonom o državnoj službi u Federaciji Bosne i Hercegovine.

2.4.

6. Radna tijela Općinskog vijeća

Član 35.

Radi stručne obrade određenih oblasti iz samoupravnog djelokruga Općine, te predlaganja stručnih rješenja u tim oblastima, Općinsko vijeće može osnovati radna tijela: komisije, savjete, odbore i sl.

Član 36.

Radna tijela Općinskom vijeću daju mišljenja, podnose prijedloge i izvještavaju Općinsko vijeće o određenim pitanjima iz svog djelokruga, a odlučuju samo onda kada su općinskim propisom ovlašćeni.

Član 37.

Općinsko vijeće može obrazovati stalna i povremena radna tijela.

Odlukom o obrazovanju radnih tijela utvrđuje se djelokrug rada i sastav radnih tijela u skladu sa Poslovníkom o radu Općinskog vijeća.

2.5.

7. Način odlučivanja Općinskog vijeća i njegovih radnih tijela

Član 38.

Općinsko vijeće donosi odluke većinom glasova ukupnog broja članova ako ovim statutom i Poslovníkom o radu Općinskog vijeća nije drugačije određeno.

Statut Općine, odluku o raspisivanju referenduma, odluku o zaduženju Općine i odluku o davanju saglasnosti za dodjelu koncesija, Vijeće donosi dvotrećinskom većinom glasova ukupnog broja vijećnika.

Član 39.

Radna tijela Općinskog vijeća rade i odlučuju, kada su za to ovlašćeni u skladu sa Odlukom o obrazovanju stalnih radnih tijela i Poslovníkom o radu Općinskog vijeća.

Član 39a.

Općina je dužna osigurati javnost rada svojih organa u postupku donošenja odluka, te omogućiti građanima da neposredno učestvuju u postupku donošenja odluka i odlučivanja u skladu sa zakonom i ovim statutom.

Rad Općinskog vijeća i njegovih radnih tijela je javan. Predstavnici medija i građani imaju pravo prisustvovati sjednicama Vijeća i njegovih radnih tijela u skladu sa Poslovníkom o radu Vijeća.

Javnost rada organa Općine ostvaruje se kroz otvorenost postupka donošenja općinskih propisa i akata, upoznavanja javnosti sa njihovom primjenom, slobodom pristupa informacijama u skladu sa zakonom, objavljivanja propisa organa Općine u skladu sa zakonom, izdavanja službenih saopćenja za medije, organizovanja konferencija za štampu, informisanja putem vlastitog informacijskog sistema, biltena Općine Ilidža i kroz druge oblike informisanja.

3. Općinski načelnik

Član 40.

Općinski načelnik predstavlja i zastupa Općinu.

Općinski načelnik odgovoran je Općinskom vijeću za obavljanje poslova iz nadležnosti samoupravnog djelokruga Općine.

Općinski načelnik odgovoran je za zakonito i stručno obavljanje prenesenih poslova kantonalne, odnosno federalne uprave.

Član 41.

Općinski načelnik, u obavljanju poslova iz samoupravnog djelokruga Općine, nadležan je za:

1. provođenje općinske politike, izvršavanje općinskih propisa i općih akata i izvršavanje prenesenih nadležnosti Općini od strane Kantona;
2. osigurava saradnju općinskih službenika sa ombudsmenima;
3. predlaže općinski budžet i druge propise koje donosi Općinsko vijeće;
4. predlaže organizaciju i djelokrug rada općinskih službi za upravu;
5. donosi Pravilnik o unutrašnjoj organizaciji općinskih službi za upravu u skladu sa zakonom;
6. podnosi prijedlog izvještaja Općinskom vijeću i javnosti o provođenju općinske politike i svojih aktivnosti;
7. obavještava Skupštinu Kantona, odnosno kantonalne organe o izvršavanju kantonalne politike i kantonalnih zakona i drugih propisa i međunarodnih ugovora, kao i o stanju u odgovarajućoj oblasti, kada je izvršavanje te politike i tih zakona, odnosno međunarodnih ugovora povjereno Općini.

U obavljanju prenesenih poslova kantonalne uprave, odnosno federalne uprave, općinski načelnik vrši poslove utvrđene zakonom kojim se uređuje kantonalna uprava, odnosno federalna uprava.

IV a – MEĐUSOBNI ODNOSI ORGANA OPĆINE

Član 41a.

Međusobni odnosi Općinskog vijeća i općinskog načelnika zasnivaju se na principima međusobnog uvažavanja i saradnje, uz pojedinačnu odgovornost za ostvarivanje vlastitih nadležnosti i zajedničku odgovornost za funkcionisanje Općine.

Član 41b.

Općinski načelnik je dužan u pisanom obliku dva puta godišnje informisati Vijeće o ostvarivanju politike Općine, koju utvrđuje Vijeće, i odgovoriti na postavljena vijećnička pitanja i inicijative najkasnije do naredne sjednice Vijeća.

Član 41c.

Općinsko vijeće dužno je razmotriti prijedlog rješenja, zaključka, izvještaja, informacije i drugog akta koji općinski načelnik dostavi Vijeću i o njemu izjasniti najkasnije u roku od 30 dana.

Član 41d.

Općinsko vijeće odnosno općinski načelnik može u skladu sa procedurom i rokovima utvrđenim zakonom zatražiti da Vijeće odnosno načelnik preispita odluku ili akt koji smatra neustavnim ili nezakonitim.

Vijeće odnosno načelnik ima obavezu međusobnog dostavljanja svih propisa i drugih općih akata koje donese u okviru svojih nadležnosti utvrđenih zakonom.

V – OSNOVI ORGANIZACIJE ORGANA UPRAVE

1. Službe za upravu

Član 42.

Unutrašnja organizacija općinskih službi za upravu uređuje se Pravilnikom o unutrašnjoj organizaciji u skladu sa zakonom.

Član 43.

Općinske službe za upravu, u skladu sa zakonom i ovim statutom, neposredno obavljaju sljedeće upravne i druge stručne poslove:

- izvršavaju općinske propise i druge opće akte iz samoupravnog djelokruga Općine;
- rješavaju u upravnom postupku o pravima i obavezama i pravnim interesima građana i pravnih lica iz samoupravnog djelokruga Općine;

- obavljaju nadzor nad djelatnošću javnih preduzeća i ustanova koje obavljaju na osnovu javnih ovlašćenja, utvrđenih propisima Općine;
- daju inicijative za rješavanje određenih pitanja iz samoupravnog djelokruga Općine;
- pripremaju nacрте općinskih propisa i drugih općih akata iz svoje nadležnosti;
- pripremaju nacрте pojedinačnih upravnih akata;
- obavljaju druge poslove određene zakonom, statutom i drugim općinskim propisima.

Član 44.

Rad općinskog načelnika i općinskih službi za upravu je javan, ukoliko za određene situacije zakonom nije drugačije određeno.

Član 45.

Općinske službe za upravu samostalno obavljaju poslove iz svoje nadležnosti i za svoj rad odgovorne su Općinskom vijeću i općinskom načelniku.

VI - SAVJET OPĆINSKOG NAČELNIKA

Član 46.

Radi izvršavanja poslova iz nadležnosti općinskog načelnika, općinski načelnik osniva Savjet općinskog načelnika.

Savjet općinskog načelnika čine pomoćnici načelnika, kao i druga lica koja odredi općinski načelnik.

Broj članova Savjeta općinskog načelnika utvrđuje se Odlukom općinskog načelnika o osnivanju Savjeta općinskog načelnika.

Savjet općinskog načelnika pomaže općinskom načelniku u donošenju, pripremanju i izvršavanju odluka i drugih akata iz njegove nadležnosti i vrši i druge poslove utvrđene statutom i drugim propisima Općine.

VII – NEPOSREDNO UČESTVOVANJE GRAĐANA U ODLUČIVANJU

Član 47.

Građani mogu neposredno učestvovati u odlučivanju o lokalnim poslovima iz samoupravnog djelokruga Općine referendumom, mjesnim zborom građana i građanskom inicijativom u skladu sa zakonom i ovim statutom.

1) Referendum

Član 48.

Referendum se može raspisati radi odlučivanja o prijedlogu za promjenu Statuta Općine, o prijedlogu propisa i drugih općih akata, kao i o drugim pitanjima iz djelokruga Općinskog vijeća, određenim zakonom i ovim statutom.

Referendum na osnovu zakona i ovog statuta raspisuje Općinsko vijeće na prijedlog jedne trećine članova Općinskog vijeća, na prijedlog općinskog načelnika ili na prijedlog jedne petine mjesnih zajednica na području Općine.

Član 49.

Pravo odlučivanja na referendumu imaju građani koji imaju prebivalište na području općine i koji su upisani u birački spisak.

Prijedlog po kojem su se građani izjašnjavali na referendumu smatra se prihvaćenim ako se za prijedlog izjasnilo više od polovine građana upisanih u birački spisak.

Odluka donesena na referendumu obavezna je za Općinsko vijeće i građane s tim što ona podliježe nadzoru kantonalnih organa u skladu sa zakonom.

Član 50.

Općinsko vijeće će odlučiti o prijedlogu za raspisivanje referenduma u roku od 60 dana od dana njegovog prijema.

U Odluci o raspisivanju referenduma utvrđuje se pitanje o kojem građani trebaju odlučivati na referendumu, određuje datum održavanja referenduma, kao i područje na kojem će se održati referendum.

Građani se o pitanju koje je postavljeno na referendumu izjašnjavaju "ZA" ILI "PROTIV". Referendum provodi komisija od 5 članova, koji imaju zamjenike.

Članove i zamjenike Komisije imenuje Općinsko vijeće.

Komisija obavlja sve poslove oko pripreme i održavanja referenduma, određuje glasačka mjesta, osigurava biračke spiskove, imenuje odbore za provođenje glasanja na glasačkim mjestima, organizira izjašnjavanje građana, priprema izborni materijal, utvrđuje rezultate referenduma i podnosi izvještaj o rezultatima referenduma Općinskom vijeću.

Član 51.

Prijedlog koji na referendumu nije prihvaćen ne može se ponovno iznijeti na referendum prije isteka roka od 6 mjeseci od dana održavanja referenduma.

2) Mjesni zbor građana

Član 52.

Na mjesnom zboru građani mogu raspravljati o svim pitanjima iz samoupravnog djelokruga Općine, predlagati način rješavanja određenog pitanja, odnosno donošenja akata iz djelokruga Općinskog vijeća.

Općinsko vijeće može tražiti mišljenje od zbora građana mjesne zajednice o prijedlogu općeg akta, kao i o drugim pitanjima iz djelokruga Općine određenim zakonom i ovim statutom. Mjesni zbor građana organizuje se u mjesnoj zajednici u skladu sa ovim statutom.

3) Građanska inicijativa

Član 53.

Građani imaju pravo Općinskom vijeću ili općinskom načelniku podnositi inicijative za donošenje odnosno izmjenu određenog akta ili rješavanje određenog pitanja iz njihovog djelokruga.

Građanska inicijativa iz stava 1. ovog člana mora biti svojeručno potpisana od podnosioca sa osnovnim ličnim podacima. Ukoliko su za realizaciju građanske inicijative potrebna finansijska sredstva, inicijativa mora sadržavati prijedlog načina njihovog osiguravanja.

Općinsko vijeće dužno je razmotriti građansku inicijativu ukoliko ona sadrži elemente propisane stavom 2. ovog člana i koju je potpisalo najmanje 50 birača upisanih u birački spisak Općine.

Općinsko vijeće dužno je raspravljati o prijedlogu iz stava 1. ovog člana najkasnije u roku od 60 dana od prijema građanske inicijative i odluku u pisanom obliku dostaviti podnosiocu građanske inicijative odmah po njenom donošenju.

Općinski načelnik dužan je razmotriti građansku inicijativu ukoliko ona sadrži sve elemente propisane ovim članom i podnosiocu inicijative u pisanom obliku odgovoriti u roku od 30 dana od dana prijema građanske inicijative.

Član 54.

Građani i pravna lica, na način i po postupku propisanim Zakonom o postupanju sa predstavkama i prijedlozima, imaju pravo općinskom načelniku i Općinskom vijeću podnositi predstavke i prijedloge koji se odnose na rad tih organa.

VIII MJESNA SAMOUPRAVA (MJESNA ZAJEDNICA)

1. Osnivanje mjesne zajednice

Član 55.

Mjesna samouprava podrazumijeva pravo građana da neposredno sudjeluju u odlučivanju o određenim lokalnim poslovima, koji neposredno utiču na njihov svakodnevni život.

Član 56.

Mjesna zajednica ima svojstvo pravnog lica i osniva se kao oblik neposrednog učestvovanja građana u odlučivanju o lokalnim poslovima.

Mjesna zajednica se osniva za jedno naseljeno mjesto, više međusobno povezanih manjih naselja ili za veći dio većeg naselja, koji u odnosu na ostale dijelove čini zasebnu razgraničenu cjelinu.

Odluku o osnivanju mjesnih zajednica na području općine donosi Općinsko vijeće i ona sadrži službeni naziv i sjedište mjesne zajednice, naziv naselja odnosno dijela naselja ili više povezanih naselja koji čine jednu mjesnu zajednicu i druga pitanja od značaja za organizaciju i djelovanje mjesne zajednice.

Član 57.

Inicijativu za osnivanje mjesne zajednice može dati najmanje 10% birača upisanih u popis birača naseljenih mjesta za čije se područje predlaže osnivanje mjesne zajednice, udruženja građana sa tog područja, Općinsko vijeće i općinski načelnik.

Član 58.

U pisanom obliku obrazložena inicijativa iz prethodnog člana dostavlja se Općinskom vijeću na razmatranje, koje je svoj stav dužno dostaviti podnosiocu inicijative u roku od 60 dana.

Ukoliko Općinsko vijeće inicijativu prihvati, obrazovat će osnivački odbor od 3 do 5 članova radi organiziranja zbora građana i njihovog izjašnjavanja o prijedlogu za osnivanje mjesne zajednice, izradu statuta mjesne zajednice i obavljanje drugih poslova u vezi sa osnivanjem mjesne zajednice.

Član 59.

O prijedlogu za osnivanje mjesne zajednice izjašnjavaju se građani naselja, dijela naselja ili više naselja za koji se predlaže osnivanje mjesne zajednice, i to javnim glasanjem. Istovremeno se građani izjašnjavaju o statutu mjesne zajednice.

Član 60.

Prijedlog za osnivanje mjesne zajednice smatra se usvojenim ako za njega glasa većina birača upisanih u popis birača naselja, dijela naselja ili više naselja za koje je predloženo osnivanje mjesne zajednice.

Član 61.

Odluku o prihvatanju prijedloga za osnivanje mjesne zajednice i statuta mjesne zajednice, osnivački odbor dostavlja Općinskom vijeću.

Član 62.

Ukoliko Općinsko vijeće ocijeni da je postupak usvajanja prijedloga za osnivanje mjesne zajednice proveden na pravno valjan i demokratski način, te da postoje materijalni i ostali uslovi za pravilno i efikasno funkcionisanje mjesne samouprave putem mjesne zajednice, donijeće odluku o prihvatanju inicijative za osnivanje mjesne zajednice i zadužit će nadležnu općinsku službu da pripremi i Vijeću dostavi na usvajanje Prijedlog Odluke o osnivanju nove mjesne zajednice.

Odluka o osnivanju nove mjesne zajednice sadrži naselja, dijelove naselja ili više naselja za koju se osniva mjesna zajednica, kao naziv i sjedište mjesne zajednice.

Postupak izdvajanja dijela mjesne zajednice i spajanje mjesne zajednice sa drugom mjesnom zajednicom odnosno spajanje mjesnih zajednica vrši se na način i po postupku utvrđenim za osnivanje mjesne zajednice.

Član 63.

Nakon donošenja odluke o osnivanju nove mjesne zajednice Općinsko vijeće donosi odluku o raspisivanju izbora za savjet nove mjesne zajednice.

Izbori za savjet nove mjesne zajednice održat će se najkasnije u roku od 60 dana od dana osnivanja mjesne zajednice na način i po postupku propisanim ovim statutom i statutom mjesne zajednice.

2. Nadležnost mjesne zajednice

Član 64.

Mjesna zajednica inicira, podstiče i organizira učešće građana u odlučivanju o lokalnim poslovima koji neposredno utiču na njihove svakodnevne potrebe, život i rad, a posebno:

- o izgradnji i održavanju puteva, kanalizacije, vodovoda i drugih komunalnih potreba;
- o uređenju naselja, izgradnji i održavanju parkova, nasada, dječijih igrališta, sportskih objekata i sl.;
- o čišćenju javnih površina, odvozu smeća i drugih komunalnih potreba i zaštiti čovjekove okoline;
- o drugim lokalnim poslovima od interesa za život i rad određenim statutom mjesne zajednice u skladu sa ovim statutom i drugim općinskim propisima.

Član 65.

Posebnom odlukom Općinskog vijeća, a na prijedlog općinskog načelnika, mogu se na mjesnu zajednicu prenijeti određeni stručni poslovi iz samoupravnog djelokruga Općine, koji su u nadležnosti općinskih službi za upravu, koji su od neposrednog interesa za ostvarivanje prava i obaveza građana, kao što su: dostavljanje podataka i vođenje određenih evidencija i drugih poslova od značaja za rad općinskih službi za upravu.

Sredstva za obavljanje poslova iz stava 1. ovog člana osiguravaju se iz budžeta Općine.

Član 66.

Mjesna zajednica ima statut mjesne zajednice.

Statut mjesne zajednice usvajaju građani na svom zboru.

Statut mjesne zajednice je usvojen ako je za njega glasala većina prisutnih na zboru građana.

Konačnu verifikaciju Statuta mjesne zajednice daje Općinsko vijeće.

Član 67.

Statutom mjesne zajednice, u skladu sa zakonom i ovim statutom, uređuje se postupak osnivanja mjesne zajednice, njena nadležnost (sadržaj lokalnih poslova), organi mjesne zajednice, način njihovog izbora i opoziva, njihova nadležnost, način finansiranja, djelatnost mjesne zajednice, postupak provođenja lokalnog referenduma, odnos prema Općini i njenim organima, kao i odnos prema pravnim licima na području mjesne zajednice i druga pitanja od značaja za organizaciju i rad mjesne zajednice.

Član 68.

Organi mjesne zajednice su:

1. Zbor građana
2. Savjet mjesne zajednice.

Član 69.

Zbor građana mjesne zajednice čine svi građani nastanjeni na području mjesne zajednice. Zborom predsjedava predsjednik izabran u skladu sa statutom mjesne zajednice.

Član 70.

Broj članova savjeta mjesne zajednice utvrđuje se statutom mjesne zajednice, koji ne može biti manji od pet ni veći od devet članova, a određuje se u zavisnosti od veličine područja, ekonomske razvijenosti i broja stanovnika svakog naselja na području mjesne zajednice.

Prilikom predlaganja kandidata za članove savjeta mjesne zajednice mora se voditi računa o ravnomjernoj zastupljenosti svakog naselja na području mjesne zajednice kao i da prijedlozi kandidata odražavaju nacionalnu strukturu stanovništva mjesne zajednice, mladih, te da spolovi budu ravnopravno zastupljeni, u skladu sa zakonom.

Odlukom Općinskog vijeća raspisuju se izbori za članove savjeta mjesnih zajednica, zadužuju organi za provođenje izbora i utvrđuje obaveza dostavljanja izvještaja o rezultatima provedenih izbora za članove savjeta mjesne zajednice.

Općinsko vijeće donosi odluku o potvrđivanju rezultata provedenih izbora za savjete mjesnih zajednica u roku od 30 dana od dana održavanja izbora.

Član 71.

Članove Savjeta mjesne zajednice biraju građani koji imaju prebivalište na području mjesne zajednice, neposrednim i tajnim glasanjem na način i po postupku utvrđenim ovim statutom i statutom mjesne zajednice.

Mandat članova savjeta mjesnih zajednica traje 4 (četiri) godine.

Izuzetno, mandat članovima savjeta mjesnih zajednica izabranih na izborima za savjete mjesnih zajednica održanih 10. 5. 2009. godine traje 2 (dvije) godine.

Član 72.

Savjet mjesne zajednice donosi program rada mjesne zajednice, finansijski plan i završni račun, poslovnik o svom radu i obavlja druge poslove koji su od značaja za ostvarivanje zajedničkih interesa i potreba građana sa područja mjesne zajednice utvrđene statutom mjesne zajednice.

Član 73.

Prva sjednica novoizabranog savjeta mjesne zajednice održava se najkasnije u roku od 30 dana od dana donošenja odluke Vijeća o potvrđivanju rezultata provedenih izbora za savjete mjesnih zajednica.

Prvu sjednicu savjeta mjesne zajednice saziva predsjednik savjeta mjesne zajednice iz prethodnog saziva i predsjedava sjednicom do izbora novog predsjednika savjeta mjesne zajednice.

Savjet mjesne zajednice na prvoj sjednici bira javnim glasanjem predsjednika i zamjenika predsjednika savjeta mjesne zajednice.

Odluku o izboru predsjednika i zamjenika predsjednika savjeta mjesne zajednice, savjet donosi većinom glasova ukupnog broja članova savjeta mjesne zajednice.

Odlukom Općinskog vijeća utvrđuje se visina naknade za rad članova savjeta mjesnih zajednica Općine.

Član 74.

Savjeti mjesnih zajednica dužni su najmanje jednom godišnje dostaviti Općinskom vijeću izvještaj o svom radu sa programom rada za narednu godinu.

Član 75.

Savjet mjesne zajednice može, u skladu sa ovim statutom i statutom mjesne zajednice, sazvati mjesne zborove, radi raspravljanja o određenim potrebama i interesima građana, te davanja prijedloga za rješavanje pitanja od mjesnog značaja.

Način sazivanja mjesnih zborova građana, način njihovog rada i odlučivanja, izbor predsjedavajućeg zbora građana i druga pitanja u vezi sa radom zborova građana, bliže se uređuju statutom mjesne zajednice.

Član 76.

Sredstva za zadovoljenje potreba i interesa građana u mjesnoj zajednici obrazuju se od:

1. sredstava građana, koji oni udružuju putem samodoprinosu ili na drugi način;
2. naknada za usluge i drugih prihoda, koji svojim aktivnostima ostvaruje mjesna zajednica;
3. prihode koje Općina ustupa mjesnoj zajednici, u skladu sa usvojenim planovima razvoja mjesne zajednice odnosno Općine;
4. poklona, donacija i drugih sredstava, koja u skladu sa zakonom i drugim propisima, ostvari mjesna zajednica.

Član 77.

Stručno-administrativne i tehničke poslove za potrebe organa mjesnih zajednica obavlja sekretar mjesne zajednice. Stručna služba za koordinaciju rada mjesnih zajednica jeste služba putem koje organi mjesnih zajednice koordiniraju i saraduju sa organima Općine.

Član 78.

Nadzor nad zakonitošću rada organa mjesnih zajednica vrši Općinsko vijeće.

Općinski načelnik na prijedlog Stručne službe za koordinaciju rada mjesnih zajednica ima pravo i obavezu predložiti Općinskom vijeću da raspusti savjet mjesne zajednice, odnosno razriješi dužnosti predsjednika savjeta mjesne zajednice, ako utvrdi da u svom radu učestalo krši statut mjesne zajednice, ovaj statut ili propise Općine ili ne izvršavaju povjerene im poslove.

IX - IMOVINA OPĆINE I FINANSIRANJE LOKALNE SAMOUPRAVE

1. Imovina Općine

Član 79.

Sve pokretne i nepokretne stvari, koje u skladu sa zakonom pripadaju Općini, kao što su zgrade i drugi objekti u kojima su smješteni općinski organi vlasti i druga imovina, kao i prava koja pripadaju toj imovini, čine imovinu Općine.

Imovinom u vlasništvu Općine, mora se upravljati pažljivo po načelima dobrog domaćina, u skladu sa zakonima i drugim propisima.

O sticanju, otuđivanju imovine u vlasništvu Općine, odlučuje Općinsko vijeće, samostalno ili na prijedlog općinskog načelnika.

Davanje u zakup i drugi vidovi raspolaganja općinskom imovinom bliže se uređuje općinskim propisima u skladu sa zakonom.

Član 80.

Općinsko vijeće može, ako to opće potrebe nalažu, u oblasti poslova iz samoupravnog djelokruga Općine, osnivati javno preduzeće ili javnu ustanovu, u skladu sa zakonom.

Aktom o osnivanju javnog preduzeća, odnosno javne ustanove, propisuje se način upravljanja preduzećem, odnosno ustanovom, prava osnivača, korišćenje ostvarene dobiti i druge obaveze preduzeća odnosno ustanove prema Općini.

Član 81.

Općini pripadaju prihodi za obavljanje njenih dužnosti i ovlaštenja, u skladu sa zakonom i propisom Kantona.

Općini pripadaju javni prihodi u skladu sa propisom Kantona.

Prihodi Općine su naročito:

- prihodi od nepokretnih i pokretnih stvari u vlasništvu Općine;
- prihodi od preduzeća i drugih pravnih lica u vlasništvu Općine, kao i prihodi od koncesija koje odobrava Općina;
- pokloni, nasljedstva i legati;
- općinski porezi i takse, čije stope, u granicama određenim zakonom, utvrđuje samostalno;
- pomoć i dotacije;
- naknada troškova iz budžeta Kantona za obavljanje poslova kantonalne uprave, koji su preneseni na Općinu;
- drugi prihodi utvrđeni zakonom.

Radi zadovoljenja potreba građana, sredstva se mogu prikupljati na osnovu neposrednog izjašnjavanja građana, u skladu sa zakonom i statutom.

2. Finansiranje lokalne samouprave

Član 82.

Općina ima budžet u kome se iskazuju prihodi i rashodi.

Budžet se izrađuje na način predviđen zakonom i donosi se za jednu kalendarsku godinu.

Po isteku godine, za koju je budžet donesen, sastavlja se završni račun i izvještaj o izvršenju budžeta.

O izvršenju općinskog budžeta neposredno je odgovoran općinski načelnik.

Ukoliko se godišnji budžet za narednu godinu ne može donijeti prije početka godine za koju se donosi, vodi se privremeno finansiranje i to najduže za period od tri mjeseca.

Odluku o privremenom finansiranju donosi Općinsko vijeće u skladu sa zakonom, na prijedlog općinskog načelnika.

Član 83.

Sve akte iz prethodnog člana donosi Općinsko vijeće, na prijedlog općinskog načelnika.

Općinski načelnik neposredno je odgovoran Općinskom vijeću za pravilno i zakonito izvršavanje ovih akata.

Član 84.

Općina samostalno raspolaze prihodima koji joj pripadaju i može se zaduživati i zaključivati ugovore o kreditu, o čemu odluku donosi Općinsko vijeće.

X - PROPISI I DRUGI AKTI OPĆINE

1. Propisi i drugi akti Općinskog vijeća

Član 85.

Općinsko vijeće, u okviru djelokruga ovlašćenja utvrđenih zakonom i statutom Općine, donosi Statut Općine, općinske propise (odluke), budžet, završni račun i izvještaj o izvršenju budžeta, Poslovnik o radu Općinskog vijeća i zaključke, daje autentična tumačenja propisa, koje donosi i utvrđuje njihov prečišćeni tekst.

Prilikom pripreme i izrade prijedloga akata iz djelokruga rada službi jedinstvenog općinskog organa uprave Općine, koje donosi Općinski načelnik i Općinskog vijeće, obavezno se primjenjuju Jedinstvena pravila za izradu pravnih propisa u institucijama Bosne i Hercegovine.

Propisi i opći akti organa Općine moraju biti objavljeni u „Službenim novinama Kantona Sarajevo” u skladu sa zakonom i Poslovnikom Općinskog vijeća i isti stupaju na snagu kao što je u njima propisano, ali ne prije nego što budu objavljeni.

Član 86.

Općinsko vijeće donosi općinske propise u obliku odluke.

Član 87.

Odlukom se uređuju pitanja i odnosi iz samoupravnog djelokruga Općine.

Član 88.

U obavljanju poslova iz svoje nadležnosti, Općinsko vijeće donosi rješenja i zaključke kao pojedinačne akte.

Rješenjem se odlučuje o imenovanju, postavljenjima i razrješenjima odnosno smjenjivanja, kao i drugim pojedinačnim pitanjima iz nadležnosti Općinskog vijeća.

Zaključkom se utvrđuju stavovi o pitanjima od značaja za provođenje utvrđene politike i općinskih propisa iz samoupravnog djelokruga Općine, kao i zadaci za općinskog načelnika ili općinske službe za upravu prilikom razmatranja pitanja iz njihovog djelokruga i drugim pojedinačnim pitanjima iz nadležnosti Općinskog vijeća, o kojima se ne odlučuje rješenjem.

2. Akti Općinskog načelnika

Član 89.

Općinski načelnik osigurava izvršenje svih zakonskih propisa, kao i propisa Općine, na način i u postupku propisanom zakonom i ovim statutom.

Član 90.

Općinski načelnik, u izvršavanju propisa i općih akata iz samoupravnog djelokruga Općine, donosi opće akte (uredbe, naredbe, pravilnike i uputstva) i pojedinačne akte kojima se rješava o pravima, obavezama i pravnim interesima fizičkih i pravnih lica u prvom stepenu.

Protiv upravnih akata Općinskog načelnika donesenih u prvom stepenu na osnovu Statuta Općine ili propisa Općinskog vijeća u drugom stepenu rješava Drugostepena stručna komisija Općinskog vijeća Ilidža.

Član 91.

Općinski načelnik, u prenesenim poslovima kantonalne uprave, rješava u upravnim stvarima u prvom stepenu.

Protiv upravnih akata općinskog načelnika iz prethodnog stava u drugom stepenu rješava nadležno kantonalno ministarstvo.

XI – UPRAVNI NADZOR

Član 91a.

Upravni nadzor nad radom organa Općine obavlja se na način i po postupku predviđenom zakonom.

Član 91b.

Upravni nadzor nad radom općinskih organa i tijela u vršenju vlastitih nadležnosti Općine vrši se na način da se ojača uloga nezavisnih tijela, te unutrašnji mehanizam nadzora, posebno u oblasti finansija i upravljanja imovinom Općine.

Član 91c.

Općinsko vijeće donosi odluku o obrazovanju Nadzornog odbora kao radnog tijela koje će vršiti nadzor i kontrolu upravljanja i raspolaganja imovinom Općine, kontrolu javne potrošnje i trošenje budžetskih sredstava.

Član 91d.

Organi Općine obavezni su u potpunosti provesti naložene mjere i sudske odluke koje se donose u okviru nadzora nad radom općinskih organa.

XII – SARADNJA SA DRUGIM OPĆINAMA

Član 92.

U obavljanju poslova iz samoupravnog djelokruga, Općina ostvaruje saradnju sa drugim općinama.

Saradnja iz prethodnog stava se planira i ostvaruje u poslovima koji su od njihovog zajedničkog interesa.

Saradnju sa drugim općinama ostvaruju Općinsko vijeće odnosno općinski načelnik, svako u pitanjima iz svog djelokruga.

Član 93.

Općina se može udruživati u zajednicu općina za određeno područje, u skladu sa zakonom.

Odluku o udruživanju općine u zajednicu općina donosi Općinsko vijeće, samostalno ili na prijedlog općinskog načelnika.

Odlukom o udruživanju utvrđuju se ciljevi udruživanja, način ostvarivanja tih ciljeva u zajednicu općina i druga pitanja od značaja za rad u zajednici općina.

Član 94.

Općina može pristupiti međunarodnim udruženjima lokalnih zajednica i saradivati s odgovarajućim lokalnim jedinicama drugih država, u skladu sa zakonom.

Odluku o pristupanju udruženjima, odnosno ostvarivanju saradnje iz prethodnog stava donosi Općinsko vijeće.

Član 95.

Općina se može udruživati u Savez općina Federacije, o čemu odlučuje Općinsko vijeće.

XIII - NAČIN PROMJENE STATUTA

Član 96.

O promjeni Statuta Općine odlučuje Općinsko vijeće, dvotrećinskom većinom glasova ukupnog broja izabranih vijećnika.

Prijedlog za promjenu Statuta može podnijeti jedna trećina članova Općinskog vijeća, kao i općinski načelnik.

Prijedlog mora biti obrazložen, a podnosi se predsjedavajućem Općinskog vijeća u pisanoj formi.

Inicijativu za promjenu Statuta, mogu dati građani putem mjesnih zborova, u obliku građanske inicijative.

Član 97.

O prijedlogu za promjenu Statuta raspravlja se na sjednici Općinskog vijeća.

Općinsko vijeće može raspisati referendum za promjenu Statuta Općine.

Ako se ne prihvati prijedlog za promjenu Statuta, isti prijedlog ne može se ponovno staviti na dnevni red Općinskog vijeća prije isteka 6 mjeseci od kada je rasprava o prijedlogu na Općinskom vijeću zaključena.

Prihvaćeni prijedlog za promjenu Statuta Općine, dostavlja se svim članovima Općinskog vijeća, mjesnim zajednicama, političkim strankama, koje djeluju na području općine, radi vođenja javne rasprave o predloženim promjenama i davanje primjedaba i prijedloga.

Promjena Statuta Općine je usvojena ako je za promjenu glasalo dvije trećine ukupno izabranih članova Općinskog vijeća.

Izmjene i dopune Statuta Općine vrše se odlukom Općinskog vijeća.

Član 98.

Promjenama Statuta Općine ne može se ukinuti niti umanjiti ni jedno od ljudskih prava i sloboda utvrđenih u članu II.A. do 7. Ustava Federacije Bosne i Hercegovine i instrumentima predviđenim u Aneksu Ustava Federacije.

XIV - PRIJELAZNE I ZAVRŠNE ODREDBE

Član 99.

Općinski načelnik obavezan je predložiti Općinskom vijeću odluku o obrazovanju Jedinog općinskog organa i odluku o obrazovanju organa za drugostepeno upravno rješavanje u poslovima uprave iz samoupravnog djelokruga općine, najkasnije u roku od 30 dana od dana stupanja na snagu ovog statuta.

Općinski organi uprave nastavljaju da rade prema odluci o organizaciji i radu općinskih organa do donošenja propisa iz prethodnog stava.

Član 100.

Odredbe ovog statuta o osnovama organizacije, ovlaštenjima, obavezama i odgovornostima pomoćnika općinskog načelnika, službenicima i namještenicima i sredstvima za rad organa uprave, shodno se primjenjuju i na stručne, tehničke i druge službe, koje su osnovane za potrebe Općinskog vijeća, općinskog načelnika i općinske službe za upravu.

Član 101.

Organiziranje mjesnih zajednica u skladu sa ovim statutom izvršit će se u roku od tri mjeseca od dana stupanja na snagu ovog statuta.

Član 101a.

Općinsko vijeće dužno je donijeti odluku o osnivanju mjesnih zajednica na području općine, Statute mjesnih zajednica, Poslovnik o radu Općinskog vijeća i sve druge propise i akte u roku od 6 mjeseci od dana stupanja na snagu ove odluke.

Član 102.

Danom stupanja na snagu ovog statuta prestaje važiti Statutarna odluka o organiziranju općine Ilidža, u skladu sa Ustavom Federacije Bosne i Hercegovine broj: 01/009/96 od 05.01.1990.godine (Službene novine grada Sarajeva“, broj 2/96).

Član 103.

Prečišćeni tekst Statuta općine Ilidža sadrži:

- Statut općine Ilidža („Službene novine Kantona Sarajevo“, broj 5/98)
- Odluku o izmjenama i dopunama Statuta općine Ilidža („Službene novine Kantona Sarajevo“, broj 3/10)
- Odluku o izmjeni Statuta općine Ilidža („Službene novine Kantona Sarajevo“, broj 24/10) u kojima je označen dan stupanja na snagu istih.

Član 104.

Prečišćeni tekst Statuta općine Ilidža objavit će se u "Službenim novinama Kantona Sarajevo".

PREDSJEDNICA KOMISIJE

Belma Bajrović